



Grupo Provincial Socialista

Rúa Progreso, 32 – 2º andar

32003 Ourense

Tlf. 988 385 203 Tlf/Fax. 988 385 178

CIF: G32244345

ÁLVARO VILA ARAUJO, voceiro do Grupo Provincial Socialista da Deputación de Ourense, en base ao previsto na Lei de Bases Reguladora do Réxime Local, ó artigo 91 e 97, entre outros, da Regulación de Organización, Funcionamento e Réxime Xurídico das Entidades Locais e o Regulamento desta corporación presenta unha **MOCIÓN PARA A INMEDIATA POSTA EN MARCHA DUN PLAN DE AXUDAS DIRIXIDAS AOS GANDEIROS CON EXPLOTACIÓNS AFECTADAS POLA ENFERMIDADE HEMORRÁXICA EPIZOÓTICA**.

Durante as últimas semanas a Enfermidade Hemorráxica Epizoótica (EHE) acabou por afectar ao total das catorce comarcas veterinarias nas que se divide a provincia de Ourense. O pasado 5 de setembro, a Consellería de Medio Rural informaba da localización de novos focos do andazo nas zonas de Ribadavia e Valdeorras, que até entón non tiñan rexistrados casos activos da doenza. Se ben existen dificultades para obter informacións fidedignas sobre o impacto real da EHE sobre o terreo, atendendo ás cifras oficiais ao noso dispor pódese colixir do groso de explotacións afectadas en Galicia, a meirande parte de granxas damnificadas atópase en Ourense, seguido por Lugo e Pontevedra, onde aínda a comezos de mes se rexistraron os primeiros diagnósticos positivos da enfermidade. No sobranceiro impacto da doenza na provincia teñen que ver as elevadas temperaturas e a falta de chuvias, na orixe da multiplicación da presenza do mosquito culicoide coma principal vector de transmisión, e o feito de non ter padecido a EHE con anterioridade, non podendo xerar os animais inmunidade en campañas precedentes.

A EHE non afecta a seres humanos, non é contaxiosa e tampouco implica ningún problema para o consumo en xeral. Porén, supón graves complicacións para as reses afectadas: o animal comeza a ter dificultades respiratorias que, acompañadas de secrecións nasais e oculares, provocan descamaduras e úlceras en boca e lingua, sendo o animal incapaz de comer e beber. No caso das vacas, estas deixan de producir leite, co prexuízo que se deriva directamente para os becerros. En último termo, febril e anoréxico, o animal falece no 10% dos casos, mentres que, no suposto de superar o andazo, non se pode garantir unha recuperación completa, exenta de efectos secundarios. O problema non é soamente o deceso da res, senón a perda de rendemento económico da mesma por falta de apetito e engorde, entre outros efectos conexos. Nos casos nos que sobrevive, os gandeiros non saben o futuro que lle espera á vaca ou boi, non quedando asegurada a capacidade de reprodución no caso dos machos, sendo o seu destino máis probable o matadoiro. Se ben non deixa de xerar gastos, é unha incógnita se o animal será rendible ou non.

A infección está a provocar grandes perdas nas granxas de vacún de Ourense. Entre outros, consultas veterinarias, aplicación de medicamentos, traballos de desinfección, vacinas, mortes de animais adultos, abortos e descenso na rendibilidade das reses. Alén dos gastos correntes, o sector está preocupado polo baremo establecido para as indemnizacións, constatándose que por un animal falecido por ataque de lobo os gandeiros perciben até cinco veces máis que se perde a vida pola EHE. Unha vaca sa no matadoiro non baixaría duns 1.800 euros, un monto catro veces superior do que se está a compensar pola administración. Polo contrario, se o animal morre, a situación non é mellor porque, no hipotético caso que fose tan doado substituír á res falecida por outra de semellantes características, un exemplar adulto do país non custa menos de 2.500 euros. E todo coa agravante que na nosa provincia as explotacións non teñen soamente unha función económica, senón que se

socialistaourense@gmail.com

 Facebook: [PSdeGdeOurense](#)

 Twitter: [@PSdeGDepOU](#)



Grupo Provincial Socialista

Rúa Progreso, 32 – 2º andar

32003 Ourense

Tlf. 988 385 203 Tlf/Fax. 988 385 178

CIF: G32244345

entoxan determinantes desde o punto de vista social e medioambiental, erixíndose coma sostén fundamental do noso rural.

No sector sucédense as denuncias contra a administración autonómica. Primeiramente, por falta de previsión: en novembro de 2023 produciuse un episodio significativo de EHE con cinco brotes nas provincias de Ourense e Lugo, que debería ter servido de aviso e lección para poñer en marcha un plan de prevención e, chegado o momento, de actuación. Doutra banda, desde a Consellería de Medio Rural non se teñen interesado pola realidade particular dos afectados, sendo flagrante a falta información, “que chega con contagotas”, e o exceso de burocracia para solicitar axudas. Os gandeiros apenas chegan a recibir a axuda dos servizos veterinarios públicos que, nomeadamente escasos na provincia de Ourense, atópanse desbordados. A Xunta de Galicia traslada o problema ao Ministerio, supeditando a súa actuación á activación de axudas por parte do goberno central, se ben as competencias e a capacidade económica residen no goberno autonómico. Entrementes, o PP defende que “Galicia é pioneira” (sic) en canto a liñas de apoio, que se concentran nunha insuficiente indemnización de 400 euros por animal falecido, cualificándoa os gandeiros de “esmola”, reivindicando solucións inmediatas para os afectados.

Por todo o exposto o Grupo Provincial Socialista presenta as seguintes **PROPOSTAS DE ACORDO**:

PRIMEIRA.- Instar á Deputación de Ourense a demandar da Consellería de Medio Rural da Xunta de Galicia a inmediata posta en marcha dun completo plan de axudas dirixidas ás explotacións afectadas pola EHE que toma en consideración a amplitude do problema, en todas as súas dimensións, e axusten as contías dos subsidios ás perdas reais dos profesionais do sector.

SEGUNDA.- Instar á Deputación de Ourense a demandar da Consellería de Medio Rural da Xunta de Galicia o incremento de dotacións e capacidades dirixidas ao sector gandeiro na provincia de Ourense, que inclúen un incremento de veterinarios clínicos e a apertura dun laboratorio de sanidade animal, tal e como xa existe nas outras tres provincias galegas.

TERCEIRA.- Instar á Deputación de Ourense á posta en marcha dun programa de axudas dirixidas ao sector gandeiro afectado pola EHE tendente a paliar no curto prazo as perdas das explotacións, garantindo a súa estabilidade mentres non se activen os subsidios autonómicos e estatais dirixidos a tal efecto.

En Ourense, a 13 de setembro de 2024.

Asinado: **Álvaro Vila Araújo**

SR. PRESIDENTE DA DEPUTACIÓN PROVINCIAL DE OURENSE

socialistaourense@gmail.com

[Facebook: PSdeGdeOurense](#)

[Twitter: @PSdeGDepOU](#)